

FJALA E DEPUTETIT ENKELEJD ALIBEAJ

E HËNË 23 MAJ 2022

Nuk e di pse në momente të tilla, kur flitet për çështje kaq delikate, për disa njerëz që kanë qenë burgjeve, kur ti vërtet ishe në Bllok, fillon acarohesh, kur të thonë një gjë fare të thjeshtë. Askush nuk thotë se duhet të mbash përgjegjësi ti për çfarë kanë bërë të parët e tu. Kjo është një sentencë demokratike. Por je Kryeministër i vendit dhe vetëm për këtë arsye, për të qenë i besueshëm, për të qenë demokrat, siç dikur tregon legjenda që ke predikuar, të paktën një gjë duhej ta bëje.

Mban mend një shkrim, diku nga '93-shi, me titull "Bedri Spahiu revizionon Bedri Spahiu", i vetmi në atë kohë që pati një lloj kthjellimi për të riparë atë që kishte bërë ai vetë, apo të parët e vet? Ti vetë, për të mos e politizuar, nuk ke ndonjë brejtje ndërgjegjeje për atë çfarë të parët tu kanë bërë. E thjeshtë, jo të mbash përgjegjësi. Ulu njëherë, ulu! Ulu se s'kam mbaruar! Mirë, rri në këmbë! Kjo është një gjë, që do të të lartësonte, do të të bënte më të gjatë se sa je, me thënë të drejtën, ndërkohë që vjen këtu dhe shan njërin apo tjetrin.

E di që ai gjithë jetën e vet e ka kaluar burgjeve? Ke ti ndonjë lloj ndjesie njerëzore, thjesht dhe vetëm për faktin çka hequr ai? Prandaj iku ai, sepse e ke të gjithën hipokrizi. E para. Do të të lartësonte nëse realisht do të ndieje diçka, duke filluar nga kjo: askush nuk të thotë që ti të mbash përgjegjësi për çfarë kanë bërë të parët e t'u. E dyta. Se ke filluar prej kohësh të thuash, non grata, non grata. Thjesht për simetri logjike dhe për të qenë i ndershëm, shih njëherë non gratat e tu. Ke katër. Dy dhe dy të tjerë i ke andej. Ja t'i them unë. Jo një, por disa. Ti di të lexosh shqip dhe anglisht, lexo njoftimin e Departamentin Amerikan të Thesarit apo atij të Shtetit. Kjo do të ishte fisnikëri politike. Kjo do të tregonte ty amerikanin. Kjo do të të tregonte ty properëndimorin. Është më e thjeshta që mund të bësh në aspektin njerëzor, për të mos e politizuar.

Flet ti për mbështetjen që u ke dhënë të përndjekurve apo edhe për hapjen e dosjeve? Bravo! Shumë mirë! Po pse duhet t'i nxjerrësh si një lloj virtyti që i ke bërë ti? Ti, edhe kushdo tjetër, edhe ne, për ato që s'kemi bërë, se ne s'kemi bërë shumë. Për faktin që kemi qenë dikur në qeverisje, sot je ti, kemi një borxh ndaj të gjithë atyre njerëzve, të parëve të atij që iku, jo t'u themi lart e poshtë që u kemi bërë nder, se është detyrim moral dhe ndjesi njerëzore. Këtë duhet të tregosh ti, ndjesinë njerëzore, për të

mos e politizuar. E bën do ti këtë? Kaq e thjeshtë është. Por ty çdo 16 Tetor dhe çdo “5 Maj” të dalin me flamur me yll të kuq dhe ti nuk pipëtin!

Minimalisht, thjesht dhe vetëm në respekt të atyre, eshtrat e të cilëve janë kthyer përmbys, këtë e bën dot, apo jo? Kaq. Po bëre këtë, jam unë i pari që të them faleminderit, pavarësisht kusureve që ke. Ja, e bën dot këtë ti?